

四庫全書

子部

欽定四庫全書

續名醫類案卷六十

錢塘魏之琇撰

杖瘡

張子和治一男子被杖瘡痛焮發毒氣入裏驚涎堵塞
牙噤不開粥藥不下前後月餘百治無功甘分於死
先以三聖散吐青瘡驚涎約半大缶次以利膈丸百
餘粒下臭惡燥糞又一大缶復煎通聖散數錢熱服

之更以酸辣蔥醋湯發其汗斯須汗吐交出其人活矣此法可以救寃人

鄭金曜有杖丹一方用水蛭為末和朴硝少許以水調

傅瘡上屢施於人良驗

志雅堂雜抄

崇禎庚辰黃公石齋解公石帆葉公潤山被杖士夫皆謀蚺蛇胆愚謂此大寒令人絕嗣不如三七無名異地龍蠟丸酒服則杖不知痛如不即得則白蠟一兩麝虫一枚酒服亦妙壬午則熊公魚山姜公卿墅復

以直言拜杖矣智急白如須用之中州集曰貞祐中
高琪柄國士夫被箠辱醫家以酒下地龍散投以蠟
九則受杖失痛范中歌曰嚼蠟誰知味最長一杯外
酒地龍香年來紙價長安貴不重新詩重藥方偶書
及此為之一歎痕痛青腫用菜菔爛罨之即消或用
菜豆粉調敷

客中間集

薛立齋治文刑部用晦伏闕諫南巡受杖瘀血已散壞
肉不潰用托裏之藥稍潰而膿清此血氣虛也非大

劑參耆不能補文君亦善醫以為恐腹滿強之飲食
稍思遂加大補劑飲食日進肉潰膿稠而愈嘗治江
翰林姚王鄭三吏部李姜陳三禮部南吳二刑部皆
與文同事者先散其瘀血漸用排膿托裏之藥俱愈
夫叫號則傷氣痛忍則傷血此氣血之虛明矣况脾
主肌肉脾氣受傷飲食必減血一水則肌肉不旺故
必理脾脾健肉自生若非參朮歸耆之類培養脾土
則肌肉何由而生然又須分病人虛實及有無瘀血

停積蓋打撲墜皮肉不破肚腹作痛者必有瘀血
在內宜以復元活血湯攻之老弱者四物湯加紅花
桃仁穿山甲補而行之若血去多而煩躁此血虛也
名曰亡血以獨參湯補之有損傷稍輕別無瘀血等
症但疼痛不止者惟和血氣調經脉其痛自止更以
養氣血健脾胃無有不效亦有痛傷胃氣作嘔或不
飲食者以四君子湯加藿香砂仁當歸治之若有瘀
血不先消散而加補劑則成實實之禍沒無瘀血而

妄行攻利則致虛虛之禍

夏鳳北京人因杖瘡臀膝通潰膿瘀未出時發昏憤此膿毒內作而然也急與開之昏憤愈盛此虛也以八珍湯一服少可數服死肉自腐頻取之令用猪蹄湯洗淨以神效當歸膏塗貼再以十全大補湯兩月而愈若更投破血之劑則危矣大抵杖瘡一症皆瘀血為患治療淺者砭之深者針之更以活血流氣藥和之內潰者開之有腐肉取之以壯胃生血藥托之可

保無虞有傷筋骨而作痛者以沒藥降聖丹治之若
牙關緊急或腰背反張者以玉真散治之並效

杖瘡

血脫煩躁

薛立齋治一人兩脇脹悶欲欬不欬口覺血腥遍身臂
腿脹痛倦怠不食煩渴脉大此血脫煩躁也與童便
酒及砒患處出死血糜肉甚多忽發熱煩躁汗出投
以獨參湯三劑少止又用補氣血清肝火之藥數劑

飲食少進後用獨參湯間服諸症悉退飲食頓加但
不能多寐以歸脾湯加山梔竹茹四劑而熟睡因勞
心遂煩渴自汗脉大無力以當歸補血湯二劑而安
又以十全大補去川芎加麥冬五味牡丹地骨麻黃
根炒浮麥數劑而汗止死肉且潰又二十餘劑而新
肉生

血虛發躁

一人煩燥面赤口乾作渴脉洪大按之如無此血虛發

躁也以當歸補血湯二劑即止後日晡發熱更以四
物加柴胡牡丹地骨知栢治之熱退而瘡斂東垣云
發熱惡寒大渴不止其脉大無力者非白虎湯症此
血虛發躁宜用當歸補血湯治之裴先生云肌熱躁
熱目赤面紅其脉洪大而虛此血虛也若誤服白虎
湯輕則危重則斃

氣虛血熱

一人頭額出汗熱渴氣短煩躁骨痛瘀肉不潰遂割去

之出血服芩連之藥益甚其脉洪大而微此氣血俱
為虛邪火熾盛所致以四物加參耆朮草少用柴胡
炒苓二劑頭汗頓止又加麥冬五味肉桂二劑諸症
悉退後用參耆歸朮炒芍熟地麥冬五味十餘劑瘀
血潰而膿水稠矣但新肉不生以前藥倍用白朮而
歛

瘀血泛注

一人瘀血流注腰脅兩足俱黑隨飲童便酒砭出瘀血

糜肉投以小柴胡湯去半夏加山萸芩連骨碎補以清肝火用八珍茯苓以壯脾胃死肉潰而新肉生後瘡復潰得靜調治年餘而痊

一人瘀血攻注陰囊潰而成漏膿水清稀所服皆寒涼之劑診其肝脉短澁餘脉浮而無力此肝木受肺金尅制又元氣虛不能收斂遂用壯脾胃生氣血之方元氣少復後終歿于金旺之日

瘀血作痛

一人腫痛發熱作渴汗出此陰血受傷也先砭去惡穢
以通壅塞後用四物柴苓山巵丹皮骨碎補以清肝
火而愈

一人傷處揉散惟腫不消此瘀血在內宜急砭之不從
乃以蘿蔔自然汁調山梔末敷之破處以當膏貼之
更服活血之劑而瘡數年後但遇天陰仍作痒痛始
知不砭之失

一人臀腿黑腫而皮不破但脹痛重墜皆以為內無瘀

血惟敷涼藥可以止痛診其尺脉濇而結此因體肥
肉厚瘀血畜深刺去即愈否則肉潰有爛筋傷骨之
患乃入針四寸漂黑血數升腫痛遂止是日發熱惡
寒煩渴頭痛此氣血俱虛而然也以十全大補之劑
遂痊

肝火作痛

一人瘀血肉脹焮痛發熱口乾作渴飲食不甘四肢倦
怠此肝火熾盛脾土受制故患前症喜其稟實年壯

第用降火清肝活血之劑而愈

肝火忿怒

一人患處脹痛悲哀忿怒此厥陽之火為七情激之而然耳遂砭去瘀血以小柴胡湯加山梔黃連桔梗而安後用生肝血養脾氣之藥瘡潰而斂

肝火脇脹

一人患處脹痛發熱欲嘔兩脇熱脹肝脉洪大此肝火之症也但令飲童便并小柴胡湯加黃連山梔歸尾

紅花諸症果退此症若左關脉浮而無力以手按其腹及不脹者此血虛而肝脹也當以四物參苓青皮甘草之類治之若左關脉洪而有力胸脇脹痛者按之亦痛此怒氣傷肝之症也以小柴胡芎歸青皮白芍桔梗枳殼主之蓋此症不必論其受責之輕重問其患處去血之曾否但被人扭按甚重努力恚怒以傷其氣血瘀血歸肝多致前症甚則胸脇脹滿氣逆不通或血溢口鼻多致不救

肝胆虛症

一人愈後口苦腰脇脹痛服補腎行氣等藥不效按其肝脉浮而無力此屬肝胆氣虛而然耳用參耆芍歸地黃白朮麥冬五味治之而愈

血虛腹痛

一人杖後服四物桃仁紅花大黃等劑以逐瘀血腹反痛更服一劑痛益甚按其腹不痛此血虛也故喜按而不痛宜溫補之劑遂以歸身白朮參耆炙甘草二劑

痛即止

氣虛不潰

一人瘀血已去飲食少思死肉不潰又用托裏之藥膿
稍潰而清此血氣虛也非大補不可彼不從乃強與
大補之劑飲食進而死肉潰但少寐以歸脾湯加山
朮二劑而寐因勞心煩躁作渴脉浮洪大以當歸補
血湯二劑而安

寒凝不潰

一人受刑太重外皮傷破瘀血如注內肉糜爛黯腫上
自胸背下至足指昏憤不食隨以黑羊皮熱貼患處
灌以童便酒薄粥更以清肝活血調血健脾之劑神
思稍甦始言遍身強痛又用大劑養血補氣之藥腫
消食進時仲冬瘀血凝結不能潰膿又用大補之劑
壯其陽氣其膿方熟遂砭去洞見其骨塗以當歸膏
及服前藥百餘劑肌肉漸生

脾虛不斂

一人潰而不斂以內有熱毒欲寒涼藥此氣血俱虛而
不能斂耳非歸朮參耆之類培養脾土則肌肉何由
而生豈可復用寒涼剋伐消散之藥重損氣血耶遂
用前藥而愈

血虛筋攣

一人腹脹嘔吐眩暈用柴胡黃芩山梔紫蘇杏仁枳殼
桔梗川芎當歸赤芍紅花桃仁四劑而定後又出血
過多昏憤目黑用十全大補等藥而蘇時肌肉潰爛

濃水淋漓筋攣骨痛切其脉浮而濡沈而弱此因氣血耗損不能養筋筋虛不能束骨遂用養氣血之藥治之而愈

腎虛氣逆

一人杖瘡愈後失于調理頭目不清服祛風化痰藥反眩暈服牛黃清心丸又肚腹疼痛杖痕腫痒發熱作渴飲食不思痰氣上升以為杖瘡餘毒復作診之左尺脉洪大按之如無此腎經不足不能攝氣歸源遂

用人參黃耆茯苓陳皮當歸川芎熟地山藥山萸五味麥冬炙草服之尋愈後因勞熱渴頭痛倦怠少食用補中益氣加麥冬五味而痊

溫熱乘肝

一人愈後腿作痛意膿血過多瘡雖愈肝經血尚未充乃至濕熱乘虛也遂以八珍加牛膝木瓜蒼朮黃柏防己炙草以祛濕熱養陰血痛漸止乃去防己黃柏服之遂瘳

肝經鬱火

一人瘀血失砭脹痛頭渴縱飲涼童便脹頓止以蘿蔔
細搗塗之血漸散已而患處作痒仍塗之痒止後口
乾作渴小腹引陰莖作痛小便如淋時出白津此肝
經鬱火也遂以小柴胡湯加大黃黃連山卮飲之諸
症悉退再用養血藥而安夫小腹引陰莖作痛等症
往往誤認為寒症投以熱劑則諸竅出血或二便不
通以及危殆輕亦損其目矣

凡肝鬱病誤用
熱藥皆貽大患

痛傷胃嘔

一人痛甚發熱嘔吐少食胸膈痞滿用行氣破血之劑
益甚口乾作渴大便不調患處色黯此痛傷胃氣所
致遂以四君當歸炒芩軟柴胡藿香二劑諸症漸愈
又用大補之劑潰之而瘳

藥傷胃嘔

一人發熱煖痛服寒涼藥更加口乾作渴肚腹亦痛自
以為瘀血欲下之按其肚腹不痛脉微細而遲飲食

惡寒此涼藥傷胃而然也急用六君加白芍當歸炮
附子各一錢服之前症益甚反加譫語面赤意其藥
力未至耳前藥再加附子五分

非明眼不能

服之即睡覺

來諸病頓退而安

氣血不損

一人瘀血雖去飲食形氣如故但熱渴燥痛膈間有痰
以小柴胡湯加花粉貝母桔梗山芩二劑少愈又加
生地歸尾黃芩柴胡山芩花粉而愈凡治百餘人其

杖後血氣不虛者惟此一人耳治者審之

行氣之非

一人服行氣之劑胸痞氣促食少體倦色黯膿清此形氣俱虛之症也先用六君桔梗二劑胸膈氣和後用補中益氣去升麻加茯苓半夏五味麥冬治之元氣漸復而愈若用前劑戕伐元氣多致不救

下血之非

一人去其患處瘀血用四物柴胡紅花治之瘀痛頓止

但寒熱口乾飲食少思用四物白朮茯苓柴胡黃芩
花粉四劑寒熱即退用六君芍歸藿香而飲食進腐
肉雖潰膿水清稀以前藥倍用參耆歸朮茯苓二十
餘劑腐肉俱潰膿水漸稠悞服下藥一鍾連瀉四次
患處色黯喜其脉不洪數乃以十全大補倍加肉桂
麥冬五味數劑肉色紅活新肉漸生喜在壯年易于
調理又月餘而愈否則不救凡杖瘡跌撲之症患處
如有瘀血止宜砭去服壯元氣之藥蓋其氣血已損

切不可再用行氣下血之藥復損脾胃則運氣愈難
營達于下而反為敗症怯弱者多致大枉

寒藥之非

一人腫痛敷寒涼之藥欲內消瘀血反致臂腿俱冷瘀
血併胸腹痞悶急去所敷之藥以熱童便酒洗患處
服六君木香肉桂四劑瘀血解乃刺之更以壯脾胃
養氣血得痊蓋氣血得溫則凝寒極生熱變化為膿
腐潰深大血氣既敗肌肉無由而生欲望其生難矣

不砭之非

一人發熱煩躁用四物黃芩紅花軟柴胡山梔花粉煩熱已清瘀血深畜欲針出之不從忽牙關緊急患處作痛始針去膿血即安用托裏養血新肉漸長忽患處瘙痒此風熱也用祛風消毒之劑而痊

不補之非

一人臀腿脹痛發熱煩躁刺去死血脹痛少寬熱躁愈甚此血脫邪火旺而然也急用獨參湯補之少愈又

以健脾養氣血藥治之腐漸潰遂愈大抵此症宜預
調補以顧收斂切勿伐其氣血不行補益致不能收
斂

破傷風表症

一人仲夏誤傷手腰背發張牙關緊急脉浮而散此表
症也遂用羌活防風湯一劑即解此症若在秋冬腠
理緻密之時須用麻黃之類以發汗此乃暴傷氣血
不損治法也

破傷風裏症

一人杖處畧破而患痛脉洪大而實此裏症也用大芎黃湯一劑大便微行一次悉退若投表藥必死宜急分表裏虛實而治之庶無誤也

膿內炊類破傷風

一人寒熱口乾用四物參耆白朮柴胡炒芩麥冬五味四劑少退欲砭去瘀血不從後怔忡不寐飲食少思牙關牽緊頭目疼痛惡寒發熱此膿內炊也遂砭去

之即安以八珍棗仁麥冬五味二十劑前症漸愈又用前藥及獨參湯瘀肉漸潰後因勞又少寐盜汗以歸脾湯麥冬五味遠志而痊後牙關脹悶面目焮赤又似破傷風仍以爲虛用八珍等藥亦安

膿潰類破傷風

一人腹脹喘促作渴寒熱臂腿糜爛與死血相和如皮囊盛糊用童便煎四物桃仁紅花柴胡黃芩麥冬花粉服之頓退彼用黑羊皮貼之益甚後砭去膿血甚

多氣息奄奄唇口微動牙關緊急患處色黯或欲用
破傷風藥曰此氣血虛而變症也用參耆芎歸白朮
并獨參湯人乳元氣復而諸症愈乃用十全大補調
理而安此症若膿瘡內焮者宜針之若潰後口噤遺
尿類破傷風等症者乃氣血虛極也急用大補之劑
若素多痰患風症者宜清痰降火若因怒而見風症
者宜清肝降火若不慎房勞忽患前症此由腎水不
足心火熾甚宜滋陰補氣血為主若誤作風症治之

即死

內虛變瘡

一人內潰針出膿三五椀遂用大補之劑翌日熱甚汗出足冷口噤腰背反張衆欲投發散之劑曰此氣血虛極而變瘡也若作風治悞矣用十全大補等藥而愈此症或傷寒汗下過度與產婦潰瘍氣血虧損所致但當調補氣血為善若服剋伐之劑多致不救一人兩月餘瘡口未完因怒發瘡瘡口出血此怒動肝

火而為患耳用柴胡芩連山危防風桔梗天麻鉤藤
甘草治之頃愈劉宗厚云瘕有屬風火之熱內作者
有因七情怒氣而作者亦有濕熱內盛痰涎壅遏經
絡而作者惟宜補虛降火敦土平木清痰去濕

一男子杖瘡瘀肉不腐以大補之劑漸腐更以托裏健
脾藥而斂

一男子風入杖瘡牙關緊急以玉真散一服少愈再服
而安

小渠袁三因強寇入家傷其兩脇外臙作瘡數年不已
膿汁常涓涓然但飲冷則瘡間冷水浸淫而出延為
濕瘡求治張曰爾中焦當有綠水二三升涎數掬袁
曰何也張曰當被盜時驚氣入腹驚則傷膽病在少
陽經也兼兩外臙皆少陽之部此胆之甲木受邪甲
木色青當有綠水少陽在中焦如漚既伏驚涎在中
焦飲冷水咽為驚涎所阻水隨經而旁入瘡中故飲
水則瘡中水出乃上涌寒痰汗如流水次下綠水果

二三升一夕而加乾真可怪也

王涇以高宗疾奉御無狀鞭背都市流遠方後歸自言
不曾受杖嘗袒而示某以背完瑩無疵初不解其如
何也後見他醫言杖皆有癰唯噬膚之初傳以金箔
則癰立消意金木之性相制耳

程史載岳珂

金瘡

蜀志關雲長常為流矢所中貫其左臂創雖愈每至陰
雨骨常疼痛醫曰矢鏃有毒入骨當破臂刮骨去毒

乃除雲長便伸臂令劈時方請諸將飲食相對臂血流離盈于盤器而割炙飲酒言笑自若隋末高開道被箭鏃入骨命一工拔之不得開道問之云畏王痛開道斬之更命一醫云我能拔之以一小斧當刺下瘡際用小棒打入骨一寸以鉗拔之開道飲啖自若賜醫工絹三百匹

槎菴小乘

劉涓子於丹陽郊外較射忽有一物高二丈許因射而中之走如電激聲若風雨夜不敢進明日率數十人

尋其踪迹至山下見一小兒問曰何往荅曰主人昨夜為劉涓子所射取水以洗瘡因問主人是誰荅曰是黃父鬼乃將小兒還未至聞搗藥聲遙見三人一人卧一人閱書一人搗藥即齊聲叫突而前三人並走遺一帙癰疽方一白藥時涓子得之從宋武帝北征有被創者以藥塗之隨手而愈涓子用方為治千無一失演為十卷號鬼遺方

龔慶先鬼遺方叙

宋元泰中青州劉慄射一鹿剖五臟拾青草塞之蹶然

而起慍怪而拔草復倒如此三度慍錄此草種之多
主傷折俗呼劉慍草亦曰天名精此草亦寄奴之類

槎庵小乘

琇按前劉涓子及此則皆脫胎宋祖荻洲事要其
藥皆寄奴也

裴旻山行有山蜘蛛垂絲如疋布將及旻旻引弓射殺
之大如車輪因斷其絲數尺收之部下有金瘡者剪
方寸貼之血立止

南部新書

夏侯鄆為閬州有人額上有箭痕問之云從馬侍中征
田悅中箭侍中與一藥乃用巴豆微炒同蜣螂搗塗
斯須痛定微痒忍之待極痒不可忍乃撼動拔之立
出後以生肌膏傅之乃愈因以方付鄆云凡諸瘡皆
可療後鄆至洪州逆旅主人妻患瘡呻吟用此立愈

本草

綱目

蜣螂巴豆同塗痒不可當以雄磁石挾之即出象牙牡
鼠肝腦栗屑烏雞尾灰白梅仁爪仁齒噉和黑風皆

能出箭頭及針錢在肉者張子和儒門事親方端午
取葇荑作丸黃丹衣之置臍而箭頭自出劉薦叔曰
近日行伍惟以乾莧菜與沙糖塗之能出箭頭與鉛
砲子此常驗者則古方所未載也

昔有人肩髀中創血如涌出醫用原蠶沙為細末傅之

血立止一云用真降香煨存性為末貼之尤効

吹細
續錄

續醫
說

王肯堂云余近得一金瘡方大有神効功在三日長肌

肉以黃牛胆煨存性為細末敷之此實一奇方也

續醫

說

布智兒從太祖征回回身中數矢血流滿體悶仆幾絕
太祖命取一牛剖其腹納之牛腹中浸熱血中移時
遂甦又李庭從伯顏攻郢州砲傷左脇矢貫于胸幾
絕伯顏命剖水牛腹納其中良久而甦何孟春云予
在職方問各邊將無知此術者非讀元史弗知也故

書于此以備緩急

本草綱目

孫法宗苦頭創夜有女人至曰我天使也事不關善人

使者誤及耳但取牛糞煮敷之即驗如其言果瘥

宋書

本草

綱目

張禧身中十八矢一矢貫腹悶絕世祖即取血竭遣人

往療之

元史

蒙古中有墨爾根綽爾濟者精岐黃有正白旗先鋒鄂碩與蒙古戰中流矢殆甚濟為拔鏃傳以藥遂愈又都統吳拜交戰時身被三十餘矢已昏絕濟令剖白

索駝腹置拜其中遂甦又黃冠苗君稷之徒臂屈不伸濟先以熱鏝熏蒸次用斧椎其骨手捏有聲使骨

穴對好即愈

餘文節錄常撫軍宦遊筆記

薛衣道人祝巢夫名堯民洛陽諸生也少以文名明亡遂棄制舉藝為醫自號薛衣道人得仙傳瘍醫凡諸惡瘡傅其藥少許即愈人或斷脛折臂者請治之無不完好若剝腹洗腸破腦濯髓則如華陀之神里有被賊斷頭者頭已殊其子知其神謂家人曰祝巢夫

仙人也速為我請來家人曰郎君何妄也頸不連項
矣彼即有返魂丹烏能合既離之形骸哉其子因強
之既至祝撫其胸曰頭雖斷身尚有煖氣煖氣者生
氣也有生氣則尚可以治急以銀針紉其頭于項既
合塗以末藥一刀圭熨以炭火少頃煎人參湯雜他
藥啟其齒灌之須臾則鼻微有息矣復以熱酒灌之
逾一晝夜則出聲矣又一晝夜則呼其子而語矣乃
進以糜粥又一晝夜則可舉手足矣七日而創合半

月而如故舉家作謝願產之半酬之堯民不受後入

終南山修道不知所終無子其術不傳

虞初新志
載陳定九

薛立齋治大尹劉國信金瘡出血發熱煩躁屬陰虛為
患用聖愈湯治之虛火熄而血歸經矣

梁閣老姪金瘡腫痛出血不止寒熱口乾此氣虛血無
所附而血不歸經也用補中益氣五味麥冬主之陽
氣復而愈

舉人余時正金瘡焮痛出血不止惡寒發熱用敗毒等

藥愈甚此亡血過多氣無所附而然耳遂以四物加知柏軟柴胡人參五味麥冬治之即愈

淮西總管趙領衛名禹殿巖密之子云取箭鏃法仇防禦方張循王屢求不得因奏知德壽宣取以賜之有奇効以天水牛一个獨角者尤緊以小瓶盛之用硃砂一錢細研水少許化開浸天水牛自然成水後以藥水滴箭鏃處當自出也

是齋方

凡刀刀傷用石灰不以多少端午日午時取百草搗汁

瀘過和作餅子入韭菜汁尤妙陰乾遇有傷即以末
糝之如腸胃出桑白皮縫罅之帛繫吳內翰父少保
守南雄州有刀傷人腸潰者以此藥治之全二人之
命一方只用韭汁和石灰端午日合又治刀刃傷用
五培子為末乾貼神効亦名小血竭

同上

回回田地有年七八十歲老人自願捨身濟衆者絕不
飲食惟澡身啖蜜經月便溺皆蜜既死國人殮以石
棺仍滿用蜜浸鐫誌歲月於棺蓋瘞之俟百年後啟

封則成蜜害凡人損折肢體食少許立愈雖彼中亦不多得俗曰蜜人番言本乃伊

輯畊錄

杭州赤山之陰曰宵箕泉黃大癡所嘗結廬處其徒弟沈生狎近側一女道姑同門有欲白之于師沈懼引厨刀自割勢幾死衆救得活而瘡口流血經月餘不合偶問諸閹奴教以燬所割勢搗粉酒服如其言不數日而差

全上

閩萬夫長陳君臨陣為刀砮其面瘡已愈而痛與鼻不

能合甚惡時時仰泣曰吾面無完膚生何以見妻子
死何以見父母乎乃拜項彥章求治項命壯士按其
面膚肉盡熱腐施之以法即面赤如頰盤左右賀曰
復故也

九靈山房集

湯火傷

薛立齋治一男子孟冬火傷臂作痛喘咳發熱此火毒
剋肺金之症用人參平肺散治之喘咳乃止因勞又
惡寒發熱此氣血虛也以八珍湯加桔梗白朮治之

而退再加薄桂三分以助藥勢溫氣血壞肉潰之而愈若初起焮赤作痛用神効當歸膏敷之輕者自愈重者自腐生肌神効

或用側柏葉末蠟油調敷亦効若發熱作渴小便赤色其脉洪數而實者用四物茯苓木通生甘草炒黃連脉雖洪數而虛者用八珍若患處不潰而色黯者四君芍歸黃耆之類若肉死已潰而不生肌者用四君黃耆當歸炮薑若愈後而惡寒陽氣未復也急用

十全大補湯切勿用寒涼反傷脾胃

一男子因醉被湯傷腿潰爛發熱作渴飲水脉洪數而有力此火毒為患用生地當歸苓連木通葛根甘草十餘劑諸症漸退却用參耆術草芎歸芍藥白芷木瓜新肉將完因勞忽寒熱此氣血虛而然也仍用參耆之藥加五味棗仁而安又月餘而瘡斂

一男子火傷兩臂焮痛大小便不利此火毒傳於下焦用生地當歸白芍黃連木通山梔赤苓甘草一劑二

便清利其痛亦止乃以四物參耆白芷甘草而壞肉去又數劑而新肉生

一婦人湯傷胸大潰兩月不斂脉大而無力口乾發熱日晡益甚此陰血虛火毒乘之而為患耳用四物湯加柴胡丹皮熱退身涼更用逍遙散加陳皮以養陰血壯脾胃腐肉去而新肉生

凡湯盪火燒痛不可忍或潰爛或惡瘡用松樹皮剝下陰乾為細末入輕粉少許生油調稀傅如傅不住少

絹帛縛定即生痂神妙不可言然宜預先合下以備
急自剝落而薄者尤妙李暮安撫方用牛皮膠入少
湯于火上溶稠狗毛剪碎以膠和毛攤軟帛封之直
至痂脫不痛吳內翰家婢夜炊米釜翻傷腿膝以夜
不敢白比曉已潰爛用此治之而愈

百乙方

立齋治馮氏子患火瘡驟用涼藥敷貼更加腹脹不食
以人參敗毒散加木通山梔治之外以柏葉炒為末
麻油調搽漸愈嘗用煮火汁上浮脂調銀硃塗之更

効若用涼藥逼火毒入內多致不救

王洪緒治一婦小腿經燙醫用水片研雪水敷之不一刻腿腫如斗痛極難忍曰幸在小腿若腰腹間過毒入內難挽回矣以地榆研細調油拂上半刻痛止再拂數次全愈

一使女炭火燙足背爛一孔以伏龍肝散乳調敷不三日而愈

一孩被滾湯澆腹因痛抓破皮麻油拂上一次痛止以地

榆末乾糝破處次日肌生未破者全愈

錢國賓曰余欲之遂昌宿旅次聞隔房人呼痛夜不安枕次日問店主對曰小价提滾水一桶上樓與客洗面其子拿盆後上舊桶底脫滾水灌子之頭今腫如斗面目皆平七日不食矣余即往視滿室皆臭用夏枯草一斤為末以香油調腫處厚敷上即時此痛止臭三日消腫八日痂落切忌食醬面有黑斑店主如言藥治而愈後余回其子叩謝

曾世榮曰元貞乙未春有王千戶來自廣西安船河下一子僅二周患頭疼服藥針灸不効召曾診視色脉俱好惟額上微紅以手法驗之大哭淚下其母怒而見給曾亦置之勿論但究心以病為事再問當時得病之因千戶云初在靜江時大風吹篷撲著便不快曾曰此疾若令細揣頭上便知其症彼諾之遂遣家人出外探親其父自抱曾揣之果有小篾簽刺在顙上皮下即蓬簽也以酥油潤透用鎚鑷取出痛定即

安若以匹婦饒舌而退則及幼之心不溥矣後之醫
流倘見嬰兒色脉好而病者用藥不應必有他故宜
推心推原切勿拘泥可也

幼幼
心書

富次律云治竹木刺出聖惠方曾用救一莊僕極妙其
人有一脚心刺痛楚瀕死黃昏傳藥痛尤甚至四更
視之刺已出遂安用烏羊糞爛搗水和罨傷處厚傳
之為佳

百乙
方

蟲獸傷

張薦員外住劔南張延賞判官忽被蜘蛛咬頭上一宿
咬處有二道赤色細如筋繞項上從胸前下至心經
兩宿頭腫疼大如數升碗肚漸腫幾至不救張公出
錢五百千并薦家財又數百千募能療者忽一人應
召云可治張公甚不信之欲驗其方其人云不諳方
但療人性命耳遂取大藍汁一椀以蜘蛛投之至汁
而死又取藍汁加麝香雄黃更以一蛛投入隨化為
水張公因甚異之遂令點于咬處兩日悉平作小瘡

而愈

本草綱目

字林云鰥聽形如蜥蜴出魏興居樹上見人則跳來嚙之嚙已還樹垂頭聽哭聲乃去即千歲叟也其狀頭尾一般大如搗衣杵俗名合木蛇長一二尺談野翁方名斫木蛇又名望板歸救之用嫩黃荊葉搗爛敷

之

本草綱目

處士劉易隱居王屋山嘗於齋中見一蜂冒於蛛網蛛搏之為蜂所螫墜地俄頃蜘蛛鼓腹欲裂徐行入草

嚙菸根微破以瘡就嚙處磨之良久腹漸消輕躁如
故自後人有被蜂螫者菸梗傳之則愈

筆談

蚯蚓糞能治蜂螫余少時摘黃柑為蜂所毒急以井泉
調蚯蚓糞塗之立止聞之昔人納涼檐際見巨蜂為
蜘蛛所冒蛛出取蜂受螫而墮少甦爬沙牆角以後
足抵蚯蚓糞掩其傷須臾健行卒啖其蜂於網信乎
物亦有知也沈存中筆談亦記一事與此相類但謂

以菸梗耳姑識之

客中
閑集

麻知幾材行為天所囓昇至家脛腫如罐堅若錢石毒
氣入裏嘔不下食頭痛而重往問戴人急求治法隨
即給以栴榔丸下之見兩行不瘥適戴人自舞陽回
調麻曰脛腫如此足之二陰三陽可行乎麻曰俱不
可行如是不大下之乃命夜臨卧服舟車九百五
十粒通經散三四錢比至夜半去十四行腫立消作
胡桃紋反細於不傷之脛屬其慎勿貼膏紙當令毒
氣出流膿血水常行又一日恐毒氣未盡又服舟車

九百餘粒瀉川散三四錢見六行病人曰十四行易
當六行反難何也曰病盛則勝藥病衰則不勝其藥
也六日其濃水盡又囑其濃水行時不畏風盡後畏
風也乃以愈風餅子日三服之又二日方與生肌散
一傳之而成痂嗚呼用藥有多寡使差別相懸向使
不見戴人則利戒之言非也以此知醫之難用醫尤

難

戴人即
張子和

凡風狗毒蛇咬傷者只以人糞塗傷處新糞尤佳諸藥

不及此

褚記室載出
檐曝偶談

江懷禪師為驢所咬傷鼻一僧用髮入罐子鹽泥固臍
煨過為末急以鼻蘸灰綴定以軟絹縛定効用此擦

落耳鼻亦効

醫學
綱目

薛立齋治一男子被犬傷痛甚惡心令急吮去毒血隔
蒜灸患處數壯痛即止更貼太乙膏服玉真散而愈
一男子風犬所傷牙關緊急不省人事急針患處出毒
血更隔蒜灸良久而醒用太乙膏封貼用玉真散二

服少愈更以解數散二服而痊若患重者須先以蘇合香丸灌之後進湯藥

針灸經云外邱穴治獐犬即風犬所傷發寒熱速灸三壯更灸患處立愈春末夏初狂犬咬人痛過百日得安終身禁犬肉蠶蛹食此則發不可救也宜先去惡血灸咬處十壯明日以後灸一壯百日乃止忌酒七日搗韭汁飲一二盞又方治狂犬傷令人吮去惡血灸百壯神効

治蛇入七竅急以艾炙蛇尾又法以刀破蛇尾少許入
花椒七粒蛇自出即用雄黃硃砂末煎人參湯調灌
之內毒即解 山居人被蛇傷急用溺洗咳處拭乾
以艾炙之立効又方用獨頭大蒜切片置患處以艾
于蒜上灸之每三壯換蒜多灸為妙

立齋治陳鑑居庸關人蝎螫手疼痛徹心傾刻熅痛至
腋寒熱拘急頭痛惡心此邪正二氣相搏而然以飛
龍奪命丹塗患處及服止痛之藥俱不應乃以隔蒜

灸法灸之遂愈薛母及薛皆嘗被螫如前灸之痛即止薛母又嘗為蜈蚣傷指亦用前法而愈凡蛇毒之類所傷依此療之並効本草謂蒜療瘡毒有回生之功

一獵戶腿被狼咬痛甚治以乳香定痛散不應思至陰之下血氣凝結藥力難達令隔蒜灸至五十餘壯疼痛悉去仍以托裏藥及膏藥貼之而愈

王生被門犬傷腿頃間焮痛至股翌日牙關緊急以玉

真散治之不應亦隔蒜灸三十餘壯而蘇仍以玉真散及托裏消毒藥而愈

立齋父嘗睡間有虫入耳痛脅將生薑擦猫鼻尿自出取尿滴耳內虫即出而愈又百戶張錦自謂耳内生瘡不時作痛痛而欲死痛止如故診其脉皆安靜謂非瘡也話間忽痛作度其有虫入耳令回急取猫尿滴耳果出一臭虫遂不復痛或用麻油滴之則虫死難出或用炒芝麻枕之則虫亦出但俱不及猫尿之

速也

此案耳門亦收之非重出也恐患此者不知是虫便繙閱耳

華佗傳彭城夫人夜之廁躉螫其手呻呼無賴佗令溫湯近熱漬手其中卒可得寐但旁人數為易湯湯令

煖之其旦即愈

三國志

一僧為蛇傷一脚潰爛百藥不愈一遊僧以新水數洗淨腐敗見白筋挹乾以白芷末入胆礬麝香少許糝之惡水涌出日日如此一日平復

奇疾方

蘇軾光寓婺州城外魁星館有人書一方于壁間曰此

方治諸蟲咬神妙韜光屢以救人皆驗其方用貝母
為末酒調令病者量飲之飲不得即止頃之酒自傷
處為水流出水盡為度却以貝母塞瘡口即愈雖傷
已死但有微氣可以下藥者即活神効不可言

集成

崇寧末年隴西兵士暑月中無事一卒跣立廳下為虻
蚓所中遂不救後數日又有人被其毒博識者教以
先飲鹽湯一盃次以鹽湯浸足乃愈

譚氏方治蜘蛛咬遍身瘡子以葱一枚去尖頭作孔將

蚯蚓入葱葉中緊捏兩頭勿泄氣頻搖動即化為水

點咬處差

本草

孫真人以武德中六月得蠹螋尿疾經五六日覺心悶
不佳以他法治不愈又有人教畫地作蠹螋形以刀
子細細盡取蠹螋腹中土就以唾和成泥塗之再塗
即愈方知天下萬物相感莫曉其由矣

千金方

立齋治一男子犬傷青腫作痛以蘿蔔汁調危子末敷
之以四物湯加柴胡黃芩花粉川山甲二劑少愈更

以托裏散加生地柴胡紅花數劑而潰再以托裏健
脾藥而愈

馬銘鞠傳治蜈蚣傷取蜒蟥塗上其痛立止屢試神効
又一法用舊竹筋火中將頭上燒黑取下少許研細

敷患處立愈

廣筆
記

破傷風

官使明光祖向任統制官被重傷患破傷風牙關緊急
口噤不開口面喎邪肢體弛緩用土虺蛇一條去頭

尾腸皮骨醋炙地龍五條去泥醋炙天南星八錢重
一枚炮碎為末醋炙麵糊為丸萊豆大每服三九至
五九生薑酒下仍食稀葱白粥取汗即瘥

普濟方出
本草綱目

萬密齋治一婦人年四十餘形黑而瘠性躁急先患左
腿發內癰潰後起坐萬曰瘡口未合當禁風其婦自
恃強健不聽忽一日眩仆目眈口喎身反張手足攣
曲亟求治曰此破傷風瘧病也用桂枝湯加熟附子
黃耆防風一劑而病減再服十全大補湯三劑而安

胡念菴曰一人因莖髭一拔忽然腫起不食有友人詢
余余曰此破傷風也速灸為妙瘍醫認作髭疔治以
寒涼不數日發瘰而死

醫林
指目

有男子年六十一脚腫生瘡忽食猪肉不安醫以藥利
之稍愈時出外中風汗出頭面暴腫起紫黑色多睡
耳輪上有浮泡小瘡黃汁出乃與小續命湯加羌活
一倍服之遂愈

醫說
續編

薛立齋云一男子背瘡未斂以膏藥剪孔貼之患破傷

風症而歿此先失于內補外邪襲其虛耳余見此症貼膏藥剪孔欲其通氣而反患破傷風搽歛藥生肌欲其收口而反助其餘毒以致歿者多矣可不慎哉一男子風襲瘡口牙關緊急腰背反張以玉真散一服而愈仍以托裏藥而斂

薛立齋治一婦人臂癱將愈患破傷風發熱搐搦脉浮數以當歸地黃湯治之不信乃服發散敗毒藥果甚始信服數劑而痊是症須分表裏別虛實不可驟治

原病式云破傷風因瘡熱甚鬱結營衛不得宣通怫熱遍身故多白痂是時瘡口閉塞氣難通泄熱甚則生風也不已則表傳於裏但有風熱微甚兼化故殊異矣大凡風熱燥甚怫鬱在表而裏氣尚平者善伸數欠筋脉拘急時或惡寒或筋惕而搐脉浮數而弦者宜以辛熱治風之藥開衝結滯是與傷寒怫鬱而以麻黃湯辛熱發散者同也凡用辛熱宜以寒藥佐之則免致藥中病而風熱轉甚也如治傷寒發熱用

麻黃桂枝加黃芩石膏知母之類是也或以甘草滑石蔥豉寒藥發散甚妙若表不已漸入裏裏又未甚而脉在肌肉者宜以退風熱開結滯之寒藥調之或微加治風辛熱亦得猶傷寒半表半裏以小柴胡和解之意也若裏熱已甚舌強口噤項背反張驚搐惕搦涎唾稠粘胸腹滿塞或便溺閉結或時汗出脉洪數而弦此由風熱鬱甚於裏而表熱稍罷則腠理疎泄而心火熱甚故汗出也法宜除風散結寒藥下之

後以退風熱開鬱滯之寒藥調之熱退結散則風自愈矣凡治此亦宜按摩導引及以藥幹開牙關勿令口噤使粥藥不得下也


治破傷風及金刃傷打撲傷損方名玉真散本事必用兩方皆有但人不知張叔潛知府云此方極奇居官不可闕是齋宰清流日以授直廳醫救欲死者數人奇甚用天南星防風二味等分為末破傷風以藥敷貼瘡口然後以溫酒調下一錢如牙關緊急角弓反

張用藥二錢童子小便調下或因鬪毆相打內有傷損以藥二錢溫酒調下打傷至死但心頭微溫以童子小便灌下二錢併進三服天南星為防風所製服

之不麻

是齋方

按衛生寶鑑以此方兼治狂犬所傷并諸犬咬神効



續名醫類案卷六十